

- लोकसभा चुनाव रा पांचवां चरण रे तैत काले छह राज्यां अर दो केंद्र शासित प्रदेशां री 49 सीटां माथे वोट पड़ेला।
- प्रदेश मांय करड़ी गर्मी अर लू रो दौर चाले-मॉनसून रे 31 मई ताई केरल पूगण री आस।
- पीपळ पूनम माथे 23 मई ने अबूझ सावां रे चालता अंदेशा वाळा टॉबरां रा ब्यावां माथे रोक सारू प्रशासन सावचेत।
- मोहिनी एकादशी माथे आज प्रदेश भर मांय न्यारी-न्यारी ठौड़ां धार्मिक अर सामाजिक कार्यक्रम व्ह्या।

000

लोकसभा चुनाव रा पांचवां चरण रे तैत काले छह राज्यां अर दो केन्द्र शासित प्रदेशां री 49 सीटां माथे वोट पड़ेला। आ मांय उत्तर प्रदेश री 14, महाराष्ट्र री 13, पश्चिम बंगाल री 7, बिहार अर ओडिशा री 5-5, झारखंड री 3 अर जम्मू-कश्मीर अर लद्दाख री एक-एक सीट भेळी है। ई चरण मांय केई मंत्री अर सांसदां समेत छह सौ पिच्यानवे उम्मीदवार मैदान मांय है। आं मांय केन्द्रीय मंत्री अर भारतीय जनता पार्टी रा ठावां नेता राजनाथ सिंह, स्मृति ईरानी, पीयूष गोयल कांग्रेस रा राहुल गांधी अर के.एल. शर्मा, नेशनल कॉन्फ्रेंस रा उमर अब्दुल्ला अर लोक जनशक्ति पार्टी-रामविलास गुट रा चिराग पासवान भेळा है।

000

प्रदेश मांय करड़ी गर्मी अर लू रो दौर चाले। इण ऊं आम जिन्दगी माथे असर व्हे रियो है अर लोगां रा रोज रा कामां मांय बदलाव देखीजे। लारला 24 घंटा मांय राज्य रा घणखरा हलकां मांय बत्ती रो तापमान 42 ऊं 47 डिग्री सेल्सियस रे बीचे दर्ज करी ज्यो। सब ऊं बत्ती 46 दशमलव 9 डिग्री सेल्सियस बत्ती रो तापमान बाड़मेर मांय दर्ज करी ज्यो। म्हाणा खबरनवीस बतायो के जिला मांय करड़ी गर्मी ऊं जिन्दगी माथे घणो असर पड रह्यो है।

.....

अजमेर, जयपुर, कोटा, बीकानेर अर जोधपुर संभाग मांय घणखरी ठौड़ां बळ-बळ ती हवा रो असर बण्योड़ो है। जैसलमेर मांय झुळसावण वाळी गर्मी ऊं लोग बेहाल है। तेज गर्मी रे कारण सैलाण्यां री आवक मांय कमी आयी है। चूरु जिला मांय आज आखे दिन लू रा हालात रिया। फेरु ई जिला रा सुजानगढ़ मांय धूलभरी आंधी रे साथे कुछ ठौड़ां छाटा छिडको व्ह्यो। बूंदी मांय करड़ी गर्मी रे कारण दिन रे बगत बाजारां मांय सन्नाटो पसर्यो रियो। शहर मांय न्यारी-न्यारी ठौड़ां दिन री बगत टैंकरां ऊं पाणी रो छिडकाव करी ज्यो। कोटपूतली-बहरोड़ जिला मांय ई तेज गर्मी रो असर देखण ने मिल्यो। जंगळात मेहकमां कानी ऊं जिला रा जंगळात हलकां मांय जंगळी जीवा सारू टैंकरां री मार्फत पाणी रा बन्दोवस्त कर्या जावे। अलवर मांय तेज गर्मी ऊं लोगां ने राहत दिरावण सारू नगर निकाय कानी ऊं सड़कां माथे पाणी रो छिडकाव कर्यो जावे। ई बीचे राजधानी जयपुर मांय सिंज्या धूलभरी हवा रे साथे छाटा-छिडको बूदाबांदी व्ही। इण ऊं लोगां ने गर्मी ऊं थोडो आराम मिल्यो है। मौसम केन्द्र जयपुर मुजब आवता दो-तीन दिन ताई बत्ती रा तापमान मांय खास बदलाव नी होवण रा आसार है। लू रो दौर कोई एक हफ्ता ताई बण्यो रेहवण री आस है। वठे ई दिखणाद आथूणी मानसून देश रा दिखणाद छेड़ा रा निकोबार द्वीपसमूह माथे दस्तक दे दी है। मौसम मेहकमां मुजब मॉनसून रे 31 मई ताई केरल पूगण री आस है।

000

राज्य सरकार करड़ी गर्मी अर लू रा हालात ने ध्यान मांय राखता सगळा ज़िला रा कलेक्टर ने वाजिब बन्दोवस्त करण रा निर्देश दिया है। चिकित्सा मेहकमां री अतिरिक्त मुख्य सचिव शुभ्रा सिंह न्यारा-न्यारा मेहकमां रे साथे ताल-मेल बणावण अर लू अर तापघात रा बारा मांय सगळा बन्दोवस्ता री गैरी मॉनिटरिंग करण सारू ई निर्देश दिया। श्रीमती सिंह कह्यो के तेज गर्मी ने देखता गर्मी रे कारण होवण वाळी बीमारियां रा बचाव सारू केन्द्र सरकार ई अलर्ट जारी कर्यो है।

000

मुख्यमंत्री भजन लाल शर्मा आज पाली रा दौरा माथे रह्या। वणा ज़िला रा तखतगढ़ मांय एक निजू स्कूल भवन रो उद्घाटन कर्यो अर परिसर ने देख्या। ई मौके वणा दान-दांतावा रो सनमान कर्यो। श्री शर्मा आप रा भाषण मांय केन्द्र अर राज्य सरकार री कामयाबियां ने गिणाया। वणा विद्या भारती कानी ऊं शिक्षा रा हलका मांय करी ज्या कामा री सराहवना करी।

000

जम्मू-कश्मीर रा अनंतनाग मांय काले व्ह्या आतंकवादी हमला मांय घायल व्ह्या जयपुर रा धणी लुगाई रो ईलाज चाले। मुख्यमंत्री भजनलाल शर्मा आतंकी हमला मांय घायलां ने हर जरूरी मदद सारू अहलकारां ने निर्देश दिया है। मुख्यमंत्री दफ्तर ऊं घायलां रा पिरवार वाळां ऊं फोन माथे बतळ कर ने मदद देवण रो भरोसा दिरायी ज्यो। ध्यान-जोग है के अ धणी लुगाई कश्मीर घूमण ग्या हा ई दौरान ओ हादसो व्ह्यो।

000

राष्ट्रीय पिछड़ा वर्ग आयोग री रपट मुजब, देश मांय अनुसूचित जाति दर्जा रा पढेसरा री तादाद साल 2014-15 रे मुकाबले 44 फीसदी बध ग्यी है। साल 2014-15 मांय आ तादाद 46 लाख ही, जो साल 2021-22 मांय 66 लाख व्हे ग्यी। अल्पसंख्यक महिला पढेसरा री तादाद ई साल 2014-15 रे मुकाबले 42 फीसदी बधी है। अनुसूचित जाति री महिला पढेसरा री तादाद 51 फीसदी अर अनुसूचित जनजाति रा दाखिला मांय 65 फीसदी ऊं बत्ती से बढवार दर्ज करी ज्यी है। रपट मुजब साल 2020-21 मांय ओबीसी वर्ग रा पढेसरा सारू 27 फीसदी रिजरवेशन लागू करी ज्यो हो, जिण मांय 34 हजार ऊं बत्ती टॉबरां ने दाखिलो मिल्यो। राष्ट्रीय महतव रा संस्थानां मांय, अन्य पिछड़ा वर्ग रा दाखिला मांय 71 फीसदी री बढवार व्ही है अर आ मांय महिलावां री तादाद बध ने दुगणी व्हे ग्यी है।

000

पीपळ पूनम रे मौके अबूझ सावां रे चालता अंदेशा वाळा बाळकां रा ब्याह माथे रोक सारू राज्य रा न्यारा-न्यारा जिलां मांय प्रशासन मुस्तैद निजर आ रह्यो है। सवाईमाधोपुर मांय ज़िला मुख्यालय अर उपखण्ड मुख्यालय माथे टॉबरा रा ब्याह रोकण सारू कंट्रोल रूम बणायी ज्यो है। मलारणा डूगर उपखण्ड अहलकार बद्दीनारायण विश्नोई टॉबरपणा मांय ब्याह ने सामाजिक बुराई बतावता इण ने रोकण मांय लोगां ऊं मदद री अरज करी है।

000

मोहिनी एकादशी माथे आज प्रदेश मांय न्यारी-न्यारी ठौड़ां धार्मिक अर सामाजिक कार्यक्रम व्हे रिया है। जैपर मांय मिंदरां मांय ठाकुर जी रो खास सिणगार करी ज्यो। श्री गोविंद देवजी मिंदर मांय ई मौके घणी तादाद मांय सिरधालू दर्शन करे। सरस निकुंज मांय ठाकुर राधा सरस बिहारी जी रो खास सिणगार कर ने अभिषेक करी ज्यो।

अजमेर मांय व्ह्या एक कार्यक्रम मांय विधानसभा अध्यक्ष वासुदेव देवनानी मटका, परिण्डा अर फळ बाट्या। पाली मांय भैरू घाट माथे गोपीनाथ मंदिर मांय खाटूश्याम जी रो मोवणो सिणगार करी ज्यो। सवाईमाधोपुर ज़िला मांय न्यारा-न्यारा संगठनां कानी ऊं जिणावरां अर पखेरूआं सारू दाणा-पाणी अर चारा रा बन्दोवस्त करी ज्यो।

000

जैसलमेर मांय आज गडीसर सरोवर मांय डूब जावण ऊं दो टॉबरां री मौत व्हे ग्यी। म्हाणा खबरनवीस बतायो के तीन टॉबर सरोवर मांय स्नान करण उतर्या हा। पाणी गहरो होवण रे कारण दो टॉबर सरोवर मांय डूब ग्या।

000

एंटी गैंगस्टर टास्क फोर्स पुलिस हेडक्वार्टर री टीम सीकर ज़िला रा लक्ष्मणगढ़ हलकां मांय एक ट्रक ऊं 21 क्विंटल 78 किलो ऊं बत्ती अफीम डोडा पोस्त री खेप ने पकड़ण मांय कामयाबी हासिल करी है। बरामद मादक पदार्थ री कीमत कोई साढे तीन करोड़ रुप्या बतायी जावे। अतिरिक्त पुलिस महानिदेशक दिनेश एम.एन. बतायो के ट्रक मांय गैर कानूनी मादक पदार्थ चावळ रा कट्टा रे नीचे छिपायी ज्यो हो। तस्करी रा आरोपी ड्राइवर ऊं पूछताछ करी जावे।

000

विधानसभा अध्यक्ष वासुदेव देवनानी कह्यो है के विधानसभा मांय थापित राजनीतिक आख्यान संग्रहालय ने अबे आम लोग देख सकेला। वणा कह्यो के ई सारू विधानसभा री हिफाजत अर संवेदनशीलता रो पूरा ध्यान राख्यो जावेला। श्री देवनानी संग्रहालय रा बारा मांय मिटिंग करी। मिटिंग मांय पुरातत्व मेहकमां सैलाणी मेहकमां, केंद्रीय संग्रहालय, विधानसभा संग्रहालय अनुसंधान समिति, होटल एसोसिएशन, फेडरेशन ऑफ होटल एसोसिएशन रा नुमाइन्दा मौजूद हा।

श्री देवनानी विधानसभा रा राजनीतिक आख्यान संग्रहालय रा बारा मांय सुझाव मांग्या। बैठक मांय म्यूजियम री विषयवस्तु ने भेळी करता हिंदी अर अंग्रेजी भाषा मांय फोल्डर बणावण, म्यूजियम री गरिमा मुजब रैंप अर गेट माथे राजस्थानी पेंटिंग्स बणावण, होटल मांय म्यूजियम री जाणकारी सारू मोवणी फोटो समेत फोल्डर राखण, विधानसभा रा मिनिएचर पेंटिंग्स रे साथे लिखत साहित्य रा दरसाव समेत केई सुझाव आया। श्री देवनानी कह्यो के सगळा सुझावा माथे विचार कर्यो जावेला। म्यूजियम ने बत्ती ऊं बत्ती लोग देख सके इण री कोशिश करी जावेला।

000

जोधपुर ग्रामीण हलकां मांय ऑपरेशन ऑफ्स अनामिका रे तैत करडी कार्रवाही चाले। ई अभियान रे तैत बिना नम्बर री अर बिना नम्बर प्लेट वाळां वाहनां अर काळी फिल्म लाग्या वाहनां रे खिलाफ ओ अभियान चलायो जावे। अभियान रे तैत प्रभावी कार्रवाही सारू जोधपुर ग्रामीण रा पुलिस अधीक्षक धर्मेन्द्र सिंह बतायो के ऑपरेशन रे तैत हर थाणा मांय बीट कान्सटेबल ऊं लेर वृताधिकारी थर रा अहलकारां ने टॉस्क दीरीज्यो है। वणा बतायो के ज़िला बिलाड़ा पीपाड शहर बालेसर अर शेरगढ़ थाणा ई अभियान रे तैत ठांवी कार्यवाही कर ने उत्कृष्ट ठोड़ हासिल करी है। ओ अभियान ज़िला रा सगळा थाणा, हलकां मांय चालतो रेवेला।

000